

四庫全書

子部

欽定四庫全書

喻林卷三十七

明 徐元太 撰

人事門 三十五

尚義

入峻谷者當攀葛藟可以免於顛墜猶處時俗者當據

道義然後得用自立

前漢書
敘傳註

伐冰之家不利雞豚之息委積之臣不操市井之利

後漢

書馮

衍傳

濟於舟者和於水矣義於人者祥於神矣

管子
白心

人而無義唯食而已是雞狗也彊食靡角勝者為制是

禽獸也

列子
說符

子獨不聞假人之亡與林回棄千金之璧負赤子而趨或曰為其布與赤子之布寡矣為其累與赤子之累多矣棄千金之璧負赤子而趨何也林回曰彼以利合此以天屬也夫以利合者迫窮禍患害相棄也以天屬者迫窮禍患害相收也夫相收之與相棄亦遠矣且君子

之交淡若水小人之交甘若醴君子淡以親小人甘以

絕彼無故以合者則無故以離

莊子
山木

子墨子言曰我有天志譬若輪人之有規匠人之有矩
輪匠執其規矩以度天下之方圓曰中者是也不中者

非也

墨子天
志上

商人之四方市賈信徙雖有關梁之難盜賊之危必為
之今士坐而言義無關梁之難盜賊之危此為信徙不
可勝計然而不為則士之計利不若商人之察也

墨子
貴義

今天下莫為義子獨自苦而為義子不若己子墨子曰
今有人於此有子十人一人耕而九人處則耕者不可
以不益急矣何故則食者衆而耕者寡也

墨子
貴義

有游於子墨子之門者子墨子曰盍學乎對曰吾族人
無學者子墨子曰不然夫好美者豈曰吾族人莫之好
故不好哉夫欲富貴者豈曰吾族人莫之欲故不欲哉
好美欲富貴者不視人猶強為之夫義天下之大器也
何以視人必強為之

墨子
公孟

力不若牛走不若馬而牛馬為用何也曰人能羣彼不能羣也人何以能羣曰分分何以能行曰以義故義以分則和和則一一則多力多力則彊彊則勝物

荀子王制篇

水火有氣而無生草木有生而無知禽獸有知而無義人有氣有生有知亦且有義故最為天下貴也

荀子王制篇

齊宣王問匡倩曰儒者博乎曰不也王曰何也匡倩曰曰博者貴梟勝者必殺梟殺梟者是殺所貴也儒者以為害義故不博也又問曰儒者弋乎曰不也弋者從下

害於上者也。是從下傷君也。儒者以為害義，故不弋。又問儒者鼓瑟乎？曰：不也。夫瑟以小弦為大聲，以大弦為小聲，是大小易序，貴賤易位。儒者以為害義，故不鼓也。

韓非子外

儲說左

昔晉文公將與楚人戰於城濮，召舅犯而問曰：「楚衆寡奈何？」而可舅犯對曰：「臣聞繁禮之君不足於文，繁戰之君不足於詐。君亦詐之而已。」文公以舅犯言告雍季。雍季曰：「竭澤而漁，豈不獲得？而明年無魚；焚藪而田，豈

不獲得而明年無獸詐偽之道雖今偷可後將無復非
長術也文公用舅犯之言而敗楚人於城濮反而為賞
雍季在上左右諫曰城濮之功舅犯之謀也君用其言
而賞後其身或者不可乎文公曰雍季之言百世之利
也舅犯之言一時之務也焉有以一時之務先百世之

利者乎

呂氏春秋義賞

使人左據天下之圖而右刎喉愚者不為也身貴於天
下也死君親之難視死若歸義重於身也天下大利也

比之身則小身所重也比之義則輕義所全也

淮南子
泰族訓

今行者見大樹必解衣懸冠倚劔而寢其下大樹非人之情親知交也而安之若此者信也陵上巨木人以為期易之故也又況於士乎士義可知故也則期為必矣人之所乘船者為其能浮而不能沉也世之所以賢君子者為其能行義而不能行邪僻也

呂氏春秋
秋壹行

大旱雩祭而請雨大水鳴鼓而攻社天地之所為陰陽之所起也或請焉或怒焉者何曰大旱者陽滅陰也陽

滅陰者尊壓卑也固其義也雖大甚拜請之而已無敢
有加也大水者陰滅陽也陰滅陽者卑勝尊也日食亦
然皆下犯上以賤傷貴逆節也故鳴鼓而攻之朱絲脅
之為其不義也此亦春秋之不畏強禦也

春秋繁露精華

衆人以毀形為耻君子以毀義為辱

說苑談叢

君子比義農夫比穀

說苑談叢

乞人一日不得食則餓死溝壑是欲寄口而不可得也
汝必為乞人之計則簞食豆羹之間殆有甚於乞者汝

亦畏死而取之耶充以乞人之心則盜跖之貪為是而
伯夷之廉為非是盜跖何智而伯夷何愚也

天祿閣外
史辭受

願竭力以守義今雖貧窮而不改執彫虎而試象兮
焦原而跟趾註云彫虎以喻貧試象以喻竭力焦原以
喻義言已以執彫虎之貧窮願竭力而守焦原
之義

李善註文
選思玄賦

莒國有石焦原者廣五十步臨百仞之谿莒國莫敢近
也有以勇見莒子者却行齊踵馬所以稱於世夫義之

為焦原也亦高矣賢者之於義必且齊踵此所以服一

時也

文選思
玄賦註

中黃伯曰余左執太行之獲而右搏彫虎唯象之未與
吾心試焉有力者則又願為牛欲與象鬪以自試今二
三子以為義矣將惡乎試之夫貧窮太行之獲也疏賤
義之彫虎也而吾日過之亦足以試矣

文選思
玄賦註

理之所守勢所常奪道之所閉權所必開是以生重於
利故據圖無揮劒之痛義貴於身故臨川有投跡之哀

文選陸機

演連珠

草木無大小必待春而後生人待義而後成

意林尸子

一人舉而萬夫俛首智者不為賞一人而慙萬夫義者

不取

太平御覽
刑法部京

夫瑟二十五絃其僕人鼓之則為笑賢者以其義鼓之

欲樂則樂欲悲則悲雖有暴君為之立變

太平御覽
樂部瑟

煞君之室雖生美菜有義之士弗食

太平御覽
菜部菜

丈夫重義如太山輕利如鴻毛可謂仁義也

太平御覽
羽族部鴻

鴈不擊伏鶻不擊妊蓋其義性如此

埤雅品物門鴈

設一面之網物觸而後誅之蜘蛛義者也

埤雅品物門蜘蛛

昔有國王喜食鴈肉常遣獵師張網捕鴈日送一鴈以供王食時有鴈王將五百鴈飛下求食鴈王墮網為獵師所得餘鴈驚飛徘徊不去時有一鴈連翻追隨不避弓矢悲鳴吐血晝夜不息獵師見之感憐其義即放鴈王令相隨去羣鴈得王歡喜迴遶爾時獵師具以白王

王感其義斷不捕鴈

法句譬喻經三念怒品

尚勇

武力比於虎可以御亂御衆

毛詩簡
兮註

隼急疾之鳥也飛乃至天喻士卒勁勇能深攻入敵也

鄭氏箋

詩采芑

夫撫劒疾視曰彼惡敢當我哉此匹夫之勇敢一人者

也

孟子梁
惠下

思以一毫挫於人若撻之於市朝

孟子公
孫丑上

視刺萬乘之君若刺褐夫

孟子公
孫丑上

譬之猶兩鼠鬪於穴中將勇者勝

史記趙奢傳

田光荅燕太子曰竊觀太子客無可用者夏扶血勇之人怒而面赤宋意脉勇之人怒而面青武陽骨勇之人

怒而面白光所知荆軻神勇之人怒而色不變

史記荆軻列傳

註

徐廣曰鷙鳥將擊必張羽毛也

史記酷吏義縱列傳註

一卒畢力百人不當萬夫致死可以橫行

後漢書張宗傳

猶鳩鵲捕鷹鷂豚羊弋豹虎是以每戰常負

後漢書志百官五註

夫水行不避蛟龍者漁夫之勇也陸行不避兕虎者獵夫之勇也白刃交於前視死若生者烈士之勇也知窮之有命知通之有時臨大難而不懼者聖人之勇也

莊子

秋水

天子之劍以燕谿石城為鋒齊岱為鍔晉魏為脊周宋為鐔韓魏為夾包以四夷裹以四時繞以渤海帶以常山制以五行論以刑德開以陰陽持以春夏行以秋冬此劍直之無前舉之無上案之無下運之無旁上決浮

雲下絕地紀此劍一用匡諸侯天下服矣此天子之劍也
諸侯之劍以知勇士為鋒以清廉士為鍔以賢良士為
脊以忠勝士為鐔以豪傑士為夾此劍直之亦無前舉
之亦無上案之亦無下運之亦無旁上法圓天以順三
光下法方地以順四時中知民意以安四鄉此劍一用
如雷霆之震也四封之內無不賓服而聽從君命者矣
此諸侯之劍也庶人之劍蓬頭突鬚垂冠曼胡之纓短
後之衣瞋目而語難相擊於前上斬頸領下決肝肺此

庶人之劍無異於鬪雞一旦命已絕矣無所用於國事

莊子

說劍

國以難攻起一取十國以易攻起十亡百國好力曰以

難攻國好言曰以易攻民易為言難為用

商子
說民

今使一死賊伏於曠野千人追之莫不梟視狼顧何者
恐其暴起而害已也是以一人投命足懼千夫今臣以

五萬之衆而為一死賊率以討之固難敵矣

吳子
厲士

有狗彘之勇者有賈盜之勇者有小人之勇者有士君

子之勇者爭飲食無廉耻不知是非不辟死傷不畏衆
彊忤忤然唯利飲食之見是狗彘之勇也為事利爭貨
財無辭讓果敢而振猛貪而利忤忤然唯利之見是賈
盜之勇也輕死暴是小人之勇也義之所在不傾於權
不顧其利舉國而與之不為改視重死持義而不撓是

士君子之勇也

荀子榮
辱篇

一武仗劒擊於市萬人無不避之者臣謂非一人之獨
勇萬人皆不肖也何則必死與必生固不忤也

尉繚子
制談

百里之衆不用命不如萬人之鬪也萬人之鬪不用命不如百人之奮也賞如日月信如四時令如斧鉞制如干將士卒不用命者未之聞也

尉繚子
兵令下

冉叔誓必死於田侯而齊國皆懼豫讓必死於襄子而趙氏皆恐成荊致死於韓主而周人皆畏又況乎萬乘之國而有所誠必乎則何敵之有矣刃未接而欲已得

矣

呂氏春秋
論威

一膊炭燭掇之則爛指萬石俱燭去之十步而不死同

氣異積也大勇小勇有似於此

淮南子
說林訓

鳥有沸波者河泊為之不潮畏其誠也故一夫出死千

乘不輕

淮南子
說林訓

子真為勇悍矣今未嘗見子之奇辯也一鄰之鬪也千

乘之勝也

說苑
善說

夫登高臨危而目不眴而足不陵者此工匠之所勇悍也入深淵刺蛟龍抱鼃鼉而出者此漁夫之勇悍也入深山刺虎豹抱熊羆而出者此獵夫之勇悍也不難斷

頭裂腹暴骨流血中野者此武夫之勇悍也今臣居廣
廷作色端辯以犯主君之怒前雖有乘軒之賞未為之
動也後雖有斧質之威未為之恐也此既之所以為勇

悍也

說苑
善說

兩金相擊手勇武敢敵終日大戰不破不缺

焦氏易林同
人之噬嗑

昔者與客涉瞿塘之峽即徵君欲之楚遊道也舟覆得
檣而渡有猛虎羣飲于峽一搏而獲斃者二客曰吾與
子將赴于峽下之流得一檣而俱免又搏羣虎于峽上

如制嬰兒是渡二峽也虎不制則後涉者或免于峽而

烏能免峽上之虎乎若子之勇可以倒峽而西矣

天祿關外

史崐

山

鷗之為鳥同羣相為畸類被侵雖死不避毛飾武士兼

厲以義

山海經中山經圖讚

尸子說云人謂孟賁生乎曰勇貴乎曰勇富乎曰勇三

者人之所難而皆不足以易勇故能懾三軍服猛獸也

前漢書註

東方朔傳

使見戰如餓狼之見肉則可用矣

意林商君書

負長劍赴榛薄折兕豹搏熊羆此徒獵之勇也負長劍赴深泉斬蛟龍搏鼃鼃此漁人之勇也登高涉危鵠立四顧顏色不變此陶岳之勇也剽必刺視必殺此五刑之勇也

意林胡非子

意氣難干非資扛鼎風神自勇無待翹關是以曹劇登壇汶陽之田遽反相如睨柱連城之壁更還

文苑英華庚信連珠

韓雉見申羊于魯有龍飲于沂韓雉曰吾聞之出見虎

搏之見龍射之今弗射是不行吾聞也遂射之

太平御覽池部

沂水

都尉氣如合抱之榆

太平御覽職官部都尉

若能力兼三人身與馬如膠漆手與箭如飛壺誠宜寵

異

太平御覽兵部箭下

虎狼見逼不揮戈奮劍而彈琴詠詩者吾未見其身之

可保也

太平御覽兵部戈

中郎將冠兩鵝尾鵝執鷩鳥中之異勁者也每所攫撮應

爪摧碎

太平御覽職官部虎責中郎將

譬如世間大軍戰時少有衆生為護衆故處於前陣惟

有果敢雄猛丈夫合率驍勇抗拒勍敵為護已衆處大

軍前振威而住

大寶積經四十六

譬如怯人執持刀應得安隱反生畏

大寶積經六十八

如有二象角力而鬪若一被傷退而不復

大乘密嚴經卷下

譬如波斯匿王與敵國戰時彼諸戰士食丈夫祿不勇

猛者不名丈夫

大法鼓經卷上

猶如勇士能却外難著鎧持仗心不怯弱手執弓矢脚

不移轉便不復畏外敵

出曜經五無放逸品之餘

譬如輓夫為將雖復持兵終身智勇不足卒無功名若
如英雄奮發禍亂立定一日之勲功蓋天下

大智度論卷十三

知命

知命者不立乎巖墻之下

孟子盡心上

人之情邀福者必有害若欲急長苗而反使之枯死也

趙氏註孟

公孫丑上

譬使仁者而必信安有伯夷叔齊使智者而必行安有

王子比干

史記孔子世家

君子得時則大行不得時則龍蛇遇不遇命也何必湛

身哉

前漢書揚雄傳上

夫饑饉流隸饑寒道路思有短褐之襲儋石之畜所願
不過一金然終於轉死溝壑何則貧窮亦有命矣況辱

天子之貴四海之富神明之祚可得而妄處哉

前漢書敘傳上

傳稱鼎之為器雖小而重故神之所寶不可奪移至今

負而趣者此亦窮運之歸乎

後漢書獻
帝紀論

賢者不避害譬猶彀弩射市薄命者先死

後漢書獨
行列傳

衮龍出於緼褐卿相起於匹夫故有朝賤而夕貴先卷

而後舒

晉書王
沈傳

夫食椒非養生之術咀劍豈衛性之經命之所延人肉
其骨而含嚼膏粱時或嬰患深澗乖微寵之津空谷絕
探榮之輟運之所集物穢其枯而俯仰竿牘終然離沮

宋書顧

覲之傳

周之尹氏大治產其下趣役者侵晨昏而弗息有老役夫筋力竭矣而使之彌勤晝則呻呼而即事夜則昏憊而熟寐精神荒散昔昔夢為國君居人民之上總一國之事遊燕宮觀恣意所欲其樂無比覺則復役人有慰喻其勤者役夫曰人生百年晝夜各分吾晝為僕虜苦則苦矣夜為人君其樂無比何所願哉尹氏心營世事慮鍾家業心形俱疲夜亦昏憊而寐昔昔夢為人僕趨走作役無不為也數罵杖撻無不至也眠中噉嚙呻呼

徹旦息焉尹氏病之以訪其友友曰若位足榮身資財
有餘勝人遠矣夜夢為僕苦逸之復數之常也若欲覺
夢無之豈可得耶

列子周
穆王

貴之或不生賤之或不死愛之亦不厚輕之或不薄此
似反也非反也此自生自死自厚自薄或貴之而生或
賤之而死或愛之而厚或賤之而薄此似順也非順也
此亦自生自死自厚自薄

列子
力命

北宮子謂西門子曰朕與子並世也而人子達並族也

而人子敬竝貌也而人子愛竝言也而人子庸竝行也
而人子誠竝仕也而人子貴竝農也而人子富竝商也
而人子利朕衣則短褐食則粢糲居則蓬室出則徒行
子衣則文繡食則梁肉居則連櫬出則結駟在家熙然
有棄朕之心在朝諤然有傲朕之色請謁不相及遨遊
不同行固有年矣子自以德過朕邪西門子曰子無以
知其實汝造事而窮子造事而達此厚薄之驗歟而皆
謂與子竝汝之顏厚矣北宮子無以應東郭先生曰汝

之言厚薄不過言才德之差吾之言厚薄異於是矣夫
北宮子厚於德薄於命汝厚於命薄於德汝之達也非
智得也北宮子之窮非愚失也皆天也非人也而汝以
命厚自矜北宮子以德厚自媿皆不識夫固然之理矣
西門子曰先生止矣予不敢復言北宮子既歸衣其短
褐有狐貉之溫進其菽菽有稻粱之味庇其蓬室若廣
厦之廕乘其華輅若文軒之飾終身適然不知榮辱之
在彼也在我也東郭先生聞之曰北宮子之寐久矣一

言而能寤易恒也哉

列子
力命

農赴時商趣利工追術仕逐勢勢使然也然農有水旱商

有得失工有成敗仕有遇否命使然也

列子
力命

遊於羿之彀中中央者中地也然而不中者命也

莊子
德充

符

父母於子東西南北唯命之從陰陽於人不翅於父母

彼近吾死而我不聽我則悍矣

莊子大
宗師

鹿生於山而命懸於厨今嬰之命有所懸矣

呂氏春
秋知分

虎豹在山林其命在庖厨馳不益生緩不益死

新序義勇八

梗生荆山命制輸班

焦氏易林乾之既濟

麥不終夏花不濟春如和氣何

申鑒俗嫌

終始運也短長數也運數非人力之為也曰亦有僂人

乎曰焦僂桂莽產乎異俗就有僂人亦殊類矣

申鑒俗嫌

竝時遭兵隱者不中同日被霜蔽者不傷中傷未必惡

隱蔽未必善隱蔽幸中傷不幸

王充論衡幸偶篇

螻蟻行於地人舉足而涉之足所履螻蟻死足所不

蹈全活不傷火燔野草車轆所致火所不燔俗或喜之名曰幸草夫足所不蹈火所不及未必善也舉火行有

適然也

王充論衡
幸偶篇

人之有吉凶猶歲之有豐耗命有盛衰物有貴賤一歲之中一貴一賤一壽之間一盛一衰物之貴賤不在豐

耗人之盛衰不在賢愚

王充論衡
命義篇

害氣下降因命先中聖王德施厚祿先逢

王充論衡
偶會篇

無祿之人商而無盈農而無播非其性賤貨而命妨繫

也命貧居無利之貨祿惡殖不滋之榮也

王充論衡
偶會篇

知命之工察骨體之證睹富貴貧賤猶人見盤盂之器
知所設用也善器必用貴人惡器必施賤者尊鼎不在
陪廁之側匏瓜不在堂殿之上明矣

王充論衡
骨相篇

人之溫病而死也先有凶色見於面部其病遇邪氣也
其病不愈至於身死命壽訖也國之亂亡與此同驗有
變見於天地猶人溫病而死色見於面部也有水旱之
災猶人遇氣而病也災禍不除至於國亡猶病不愈至

於身死也

王充論衡
治明篇

草木生於實核出土為栽蘖稍生莖葉成為長短巨細
皆由實核王者長巨之最也朱草之莖如鐵紫芝之栽
如豆成為瑞矣王者稟氣而生亦猶此也

王充論衡
初稟篇

富家之翁貲累千金生有富骨治生積貨至於年老成
為富翁矣夫王者天下之翁也稟氣定於身中猶鳥之
別雄雌於卵殼之中也卵殼孕而雌雄生日月至而骨
節彊彊則雄自率將雌雄非生長之後或教使為雄然

後乃敢將雌此性氣剛強自為之矣夫王者天下之雄

也

王充論衡
初稟篇

百歲之壽蓋人年之正數也猶物至秋而死物命之正
期也物先秋後秋則亦如人死或增百歲或減百也先
秋後秋為期增百減百為數

王充論衡
氣壽篇

百歲之命是其正也不能滿百者雖非正猶為命也譬
猶人形一丈正形也名男子為丈夫尊公嫗為丈人不
滿丈者失其正也雖失其正猶乃為形也夫形不可以

不滿大之故謂之非形猶命不可以不滿百之故謂之

非命也

王充論衡
氣壽篇

猶珠玉之在山澤天命難知人不耐審雖有厚命猶不

自信故必求之也

王充論衡
命祿篇

雖其貧賤使富貴若鑿溝伐新加勉力之趨致彊健之
勢鑿不休則溝深斧不止則薪多無命之人皆得所願
安得貧賤凶危之患哉然則或時溝未通而遇湛新未
多而遇虎仕宦不貴治產不富鑿溝遇湛伐新逢虎之

類也

王充論衡
命祿篇

貴賤在命不在智愚貧富在祿不在頑慧

王充論衡
命祿篇

命貴之人俱學獨達並仕獨遷命富之人俱求獨得並

為獨成貧賤反此

王充論衡
命祿篇

命貴從賤地自達命賤從貴位自危故夫富貴若有神

助貧賤若有鬼禍

王充論衡
命祿篇

春夏囚死秋冬王相非能為之也日朝出而暮入非求

之也天道自然

王充論衡
命祿篇

富不可以籌筭得貴不可以才能成智慮深而無財才能高而無官懷銀紆紫未必稷契之才積金累玉未必陶

朱之智

王元論銜命祿篇

夫一棲之雞一欄之羊賓至而有死者豈居異哉故命

有制也知命者則不滯於俗矣

嵇中散集宅無吉凶攝生論

公侯之命稟之自然不可陶易宅是外物方圓由人有

可擇之理猶西施之潔不可為而西施之服可為也黼

黻芳華所以助貌吉宅之家所以成相

嵇中散集答釋難宅無吉凶攝

生論

明闇者才也自然而不可飾焉窮達者時也有會而不可力焉呂尚非早蔽而晚智然振素而僅遇韓信非初怯而末勇然危困而後達

抱朴子外篇廣譬

安於命者無往而非逍遙矣故雖匡陳美里無異於紫

極間堂也

郭子註
莊秋水

夫命之窮達猶金玉木石也修以學藝猶磨瑩雕刻也金玉之磨瑩自美其鑛璞木石之段塊自醜其雕刻安

可言木石之雕刻乃勝金玉之鑲璞哉不得以有學之貧賤比於無學之富貴也

顏氏家訓 務學

莊姜適衛美而無寵癭癯適齊醜而蒙幸遇不遇者不遇命也賢不賢性也怨不肖者不通性也傷不遇者不知命也

劉子遇不遇

諸子以顏冉季路逢灾蹈禍或疑其身或非其師是由魍魎問景乃未得有已也言魍魎責景之無操不知景之行止而有待或非三子之行殊不知吉凶之有命也

李善註文
選幽通賦

才非不傑也主非不明也而碎結綠之鴻輝殘懸黎之

夜色抑尺之量有短哉

文選劉峻
辨命論

譬天王之冕旒任百官以司職而或者覩湯武之龍躍

謂戡亂在神功聞孔墨之挺生謂英睿擅奇響視彭韓

之豹變謂執駕猛致人爵見張桓之朱紱謂明經拾青紫

豈知有力者運之而趨乎

文選劉峻
辨命論

齊與麥兮夏零蘭桂踐霜逾替祿命懸天難明

廣文選
傅休奕

董逃行歷

九秋篇

修心而不知命猶無室而歸

意林公
孫文子

辯命論曰顏回敗其叢蘭冉耕歌其采芣

爾雅翼
女蘿

譬如陶家作諸瓦器或始作而破者或欲成刀治坏時

破者或在塼上破者或下時破者或著地時破者或拍

時破者或坏燥時破者或窖中破者或熟時破者或移

時破者或用時破者

修行道地經
五陰成敗品

和同

妻子好

去聲

合如鼓瑟琴

詩小雅
棠棣

伯氏吹壎

音損

仲氏吹箎

音池

及爾如貫諒不我知

詩小雅
何人

風而有雨則潤澤行朋友同志則恩愛成

鄭氏箋
詩谷風

江水大汜水小然得竝流似嫡媵宜俱行

鄭氏箋
詩江有汜

芬香之酒醴饗燕賓客則多得其歡心

鄭氏箋
詩載芣

百室者出必共湓間而耕入必共族中而居又有祭酺

合醵之歡

鄭氏箋
詩良耜

共情性之和上下相親與琴瑟之音宮商相應無異若

與琴瑟為友然

毛詩正義關雎

今譬于草木寡君在君君之臭味也

左傳襄公八年

和如羹焉水火醯醢鹽梅以烹魚肉燂之以薪宰夫和之齊之以味濟其不及以洩其過君子食之以平其心

君臣亦然

左傳昭公二十年

吾從子如騂之靳

左傳定公九年

君子敬而無失與人恭而有禮四海之內皆兄弟也

論語

淵 顏

鳥獸不可與同羣吾非斯人之徒與而誰與

論語微子

爾為爾我為我雖袒裼裸裎於我側爾焉能浼我哉

孟子

公孫

丑上

漁父曰夫聖人者不凝滯於物而能與世推移舉世混濁何不隨其流而揚其波衆人皆醉何不鋪其糟而啜其醪何故懷瑾握瑜而自令見放為

史記屈原傳

事以類相從聲以音相應

陸子術事

聖人不賤石而貴玉視之如一

河上公註老子巧用

今夫闇飲者非嘗不遺飲也使之自以平則雖愚無失

矣是故不同於和而可以成事者天下無之矣

淮南子
說山訓

四馬不和取道不長父子不和其世破亡兄弟不和不

能久同夫妻不和家室大凶

說苑
敬慎

比目附翼歡樂相得行止集同終不離忒

焦氏易林
需之蹇

鹿得美草嗚呼其友九族和睦不憂饑乏

焦氏易林
比之比

一室十子同心異母以義防患禍災不起

焦氏易林
大有之小畜

宮商既和聲音相隨

焦氏易林
謙之同人

白鳥銜餌鳥呼其子施枝張翅來從其母

魚氏易林
晉之震

宮商角徵五音和起君臣父子弟順有序

焦氏易林
渙之恒

次五和釋之脂四國之夷測曰和釋之脂民說無疆也

太玄經
第二釋

次二上厯施之下律和之非則否

皮被切○大
玄經第三應

次二白黑菲菲三禽一角同尾測曰三禽一角無害心

太玄經
第四昆

夫酸鹹甘苦不同嘉味以濟謂之和善宮商角徵不同

嘉音以章謂之和聲臧否損益不同中正以訓謂之和

言趨舍動靜不同雅度以平謂之和行

申鑒雅言上

不和于民而和于瑟瑟何利于國哉和瑟之音在妾和
民之性在君君誠以妾之寵寵于衆以瑟之和和于民
則妾雖就鼎鑊之戮而諸侯皆以明歸君也

天祿閣外史齊婦

身中空虛和氣所行為陰故腎雙為陽故心特陰陽與

和共生物形君臣以和共致太平也

淮南子精神訓解

泰亦

音

入于困

古訓

字

曰浮于玄傳曰亦入于困天氣降

也回浮于玄地氣騰也

元包
太陰

心同琴瑟言鬱郁於蘭茝道協膠漆志婉戀於墳荒

文選

劉岐廣
絕交論

一人之身俱生父母四支九竅員職不同五臟六腑各有所受上下不相知中外不相覩頭足為天地肘膝為四海肝膽為胡越眉目為齊楚若不同生異軀殊體動不相因靜不相待九天之上黃泉之下未足以喻之然而頭有疾則足不能行胃有病則口不能言心得所安

則耳目聰明屈伸調利百節輕便者以同形也

道德經持歸卷

八

決斷

遇雨之吉羣疑亡也

易勝

官占之法先斷人志後命於元龜

孔氏傳書大禹謨

若射之有志

書盤庚上

夫決者智之君也疑者事之役也

後漢紀光武一

國有元龜可以決大謀朝有公卿可以定進否

晉書符堅下傳

吳起之出愛妻文公之斬顓頊皆違其情者也故能使

人彈疽者必其忍痛者也

韓子外儲說右上

次七庚斷甲我心孔碩乃後有鑠測曰庚斷甲義斷仁

也

太玄經第三斷

太公六韜云卜戰龜兆焦筮又不吉太公曰枯骨朽著

不踰人矣

因學紀聞卷十一攷史

昔有一國王為毒蛇所齧王時欲死呼諸良醫令治蛇
毒時諸醫言還令蛇噉毒氣乃盡是時諸醫各設呪術

所齧王蛇即來王所諸醫積薪然火勅蛇還嚙汝毒若不爾者當入此火毒蛇思惟我既吐毒云何還嚙此事劇死思惟定心即時入火

大智度論卷二

彊力

田者不彊困倉不盈商賈不彊不得其贏婦女不彊布帛不精官御不彊其勢不成大將不彊卒不使令侯王不彊沒世無名故云彊者事之始也分之理也物之紀也

史記龜策傳

角知者皆窮角力者皆負形不堪復伉執不足復校乃

始羈首係頸就我之銜繼耳

後漢書仲長統列傳

明公擁之以為爪牙譬驅虎兕以赴犬羊

後漢書鄭康成傳

天不可以不剛不剛則三光不明王不可以不彊不彊

則宰牧從橫

後漢書丁鴻列傳

男以彊為貴女以弱為美故鄙諺有云生男如狼猶恐

其虺生女如鼠猶恐其虎

後漢書列女傳

黑卵悍志絕衆力抗百夫筋骨皮肉非人類也延頸承

刃披胸受矢鏑鏑摧屈而體無痕捷負其材力視來丹

猶雛鷇也

列子
湯問

三虎搏狼力不相當如鷹格雉一擊破亡

魚氏易林
允之漸

次五蹠

居預切

戰喈喈若熊若螭測曰蹠戰喈喈恃力作

王也

太玄經
第三象

夫墾草殖穀農夫之力也勇猛攻戰士卒之力也構架

斲削工匠之力也治書定簿佐史之力也論道議政賢

儒之力也人生莫不有力所以為力者或尊或卑孔子

能舉北門之闕不以力自章知夫筋骨之力不如仁義

之力榮也

王充論衡
効力篇

鷹擊雀鶚啄雁未必鷹鶚南方雀雁西方自以筋力勇

壯相勝服也

太平御覽
羽族部鷹

譬如士夫用力乘船逆流而上身小疲怠船則倒還順

流而下

雜阿含經
卷十八

如四大中火最有力能照能燒

大智度論
卷二十七

譬如金翅鳥王普觀諸龍命應盡者以翅搏海令水兩

闢取而食之

大智度論
卷二十七

譬如師子有所搏撮不以小物故而改其壯勢

大智度
論卷三

四十

如能浮人心欲强故而不沉沒亦如猿猴從高上墮心

力强故身無痛患

三昧法門
經卷下

喻林卷三十七

欽定四庫全書

子部
喻林卷三十八

詳校官中書臣朱文翰

主事臣祁韻士覆勘

總校官原任中允臣王燕緒

校對官中書臣李斯咏

謄錄監生臣馮國柄

欽定四庫全書

喻林卷三十八

明徐元太撰

人事門三十六

見節

歲寒然後知松栢之後彫也

論語子罕

大寒之歲衆木皆死然後知松栢不彫傷平歲則衆木亦有不死者故須歲寒而後別之凡人處治世亦能自修整與君子同在濁世然後知君子之正不苟容

何晏
解論

罕子

風霜以別草木之性危亂而見貞良之節

後漢書盧植列傳論

渭以涇濁乃顯其清玉居鑠石乃見其貞

後漢書何顯傳贊

爾乃松柳異質薺荼殊性故疾風知勁草嚴霜識貞木

宋書顧

覲之傳

運纏明夷則艱貞之節顯時屬棟撓則獨立之操彰

宋書

孝義龔

頴傳

固此苦節易彼歲寒霜雪雖厚松柏九九

宋書孝義潘綜傳

嚴冬播氣貞松之操自高見景時昏若華之映彌顯

南齊

書高帝

本紀

白玉投泥豈能相污

魏書穆崇
曾孫弼傳

泥漬自消玉質還潔

魏書韓麒麟
子熙傳

迅寒急節乃見松筠之操危機迴構方識貞孤之風

南史

袁湛類弟

子彖傳

歲不寒無以知松栢事不難無以知君子

荀子
大畧

見邪乃知其直觀花乃知其實

陸子
思務

夫大寒至霜雪降然後知松栢之茂也據難履危利害

陳於前然後知聖人之不失道也

淮南子
做真訓

歲寒然後知松栢之後彫也世隘然後知其人之篤固

也

潛夫論
交際

玄冰未結白雪不積則青松之茂不顯俗化不弊風教

不頽則皎潔之操不別

抱朴子外
篇廣譬

風不輟則扇不用日不入則燭不明華不墮則實不結

岸不虧則谷不盈九有人安則韓白之功不著長君繼

軌則伊霍之勲不成故病困乃重良醫世亂而貴忠貞

抱朴子外

篇廣譬

幽蘭生前庭含薰待清風清風脫然至見別蕭艾中

靖陶

節集詩

五言

夫士有忠義之行踐繩墨之節其於為作乃無異於衆
人及至處患蹈難而志氣貞剛然後知其殊也譬如鍾
山之玉寒嶺之松比之瑠玕梓柳無殊也及其燒以爐
炭三日而色不改處於積氷終歲而枝葉不彫然後知

其異於他玉衆木也

劉子
大質

袒裼暴虎而後勇氣發焉超騰絕坂而後迅便露焉手

提萬鈞而後多力見焉處難踐患而後貞勇出焉

劉子
大質

殺身以成名節成而身死故曰以死償節

莊子
音義
庚桑楚

桂霜霜露而色不渝身經夷險而操不易

李善
注文選
江文通
雜體

詩

香以燔質而發芳絃以特絕而流響喻貞女沒身而舉

立烈士效節而名彰也

李善
注文選
陸士衡
演連珠

勁松彰於歲寒貞臣見於國危

文選西征賦

松栢隆冬瘁然後知歲寒不涉太行險誰知斯路難

文選

歐陽建
臨終詩

道遠知驥世偽知賢

廣文選曹子建矯志詩

弧弓弛而不張兮孰云知其所至無傾危之患難兮焉

知賢士之所死

東方朔
諤諫

霜雪既至勁栢冬青

藝文類聚人部交友篇

良玉以經焚不渝故其貞可貴竹栢以蒙霜保榮故見

殊列樹

藝文類聚賦
官部司空碑

女貞之樹一名冬生貞霜蔥翠振河凌風故清士欽其

質而貞女慕其名

藝文類聚木
部女貞頌

寒松負雪誠愧節者之徒勁草疾風寧忘烈士之槩

文苑

英華徐陵

贈荅上書

有美金于此衆人咸共詆訛言其不純賣金者欲其售

因取鍛燒以見真

太平御覽珍
寶部金下

根為石所蟠枝為風所碎賴我有貞心終凌細草輩

初學

記果木

郭松

譬如微妙淨琉璃寶雖復在泥經歷百年其性常淨出

已如本

大方等大
集經十一

譬如真金在泥終不敗壞銅鐵則壞

大智度論
卷九十三

輕羽在高遇風則飛細石在谿得流則轉唯泰山不為
飄風動磐石不為疾流移梅李遇霜而落葉唯松栢之

難凋矣

弘明集年
子理藏論

明覺

予若觀火

書盤庚上

他人有心予忖度之躍躍

音

覓

音

兔遇犬獲之

詩小雅巧言

良醫知病人之死生聖王明於成敗之事利則行之害

則舍之疑則少嘗之雖堯舜禹湯復生弗能改已

戰國策秦

胎裏

王

夫草木遭霜者不可以風過清水明鏡不可以形逃通

方之士不可以文亂

前漢書韓安國傳

金之精者能昭穢者不能昭有能昭之精金寧有不昭

之穢質

梁書范
鎮傳

有道之士貴以近知遠以今知古以益所見知所不見
故審堂下之陰而知日月之行陰陽之變見瓶水之冰
而知天下之寒魚鱉之藏也嘗一脔肉而知一鑊之味

一鼎之調

呂氏春
秋卷今

齊桓公與管仲謀伐莒謀未發而聞於國桓公怪之管
仲曰國必有聖人也桓公曰嘻日之役者有執蹠蹠而
上視者意者其是耶乃令復役無得相代少頃東郭牙

至管仲曰我不言伐莒子何故言伐莒對曰臣聞君子
善謀小人善意臣竊意之也管仲曰我不言伐莒子何
以意之對曰臣聞君子有三色顯然善樂者鍾鼓之色
也漱然清靜者衰經之色也粲然充盈手足矜者兵革
之色也日者臣望君之在屋上也粲然充盈手足矜者
此兵革之色也君喏而不吟所言者莒也君舉臂而指
所當者莒也臣竊以慮諸侯之不服者其惟莒乎臣故
言之凡耳之聞以聲也今不聞其聲而以其容與臂是

東郭牙不以耳聽而聞也桓公管仲雖善匿弗能隱矣

呂氏春秋
重言

齊桓公朝而與管仲謀伐衛退朝而入衛姬望見君下堂再拜請衛君之罪公曰吾於衛無故子曷為請對曰妾望君之入也足高氣彊有伐國之志也見妾而有動色伐衛也明日君朝揖管仲而進之管仲曰君舍衛乎公曰仲父安識之管仲曰君之揖朝也恭而言也徐見臣而有慙色臣是以知之君曰善仲父治外夫人治內

寡人知終不為諸侯笑矣桓公之所以匿者不言也今管子乃以容貌音聲夫人乃以行步氣志桓公雖不言

若暗夜而燭燎也

呂氏春秋
精諭

夫雌雄相接陰陽相薄羽者為雛驚毛者為駒犢柔者為皮肉堅者為齒角人弗怪也水生蠃蜃山生金玉人弗怪也老槐生火久血為燐人弗怪也山出鳴陽水生罔象木生畢方井生墳羊人怪之聞見鮮而識物淺也天下之怪物聖人之所獨見也利害之反覆知者之所

獨明也同異嫌疑者世俗之所眩惑也

淮南子
說論訓

處於堂上之陰而知日月之次序見瓶中之冰而知天下之寒暑夫物之所以相形者微唯聖人達其至

淮南子
兵

畧
訓

嘗一臠肉而知一鑊之味懸羽與炭而知燥濕之氣以

小明大見一葉落而知歲之將暮睹瓶中之冰而知天

下之寒以近論遠

淮南子
說山訓

千年之松下有茯苓上有兔絲上有叢蓍下有伏龜聖

人從外知內以見知隱也

淮南子
說山訓

夫兒說之巧於閉結無不解非能閉結而盡解之也不
解不可解也至乎以弗解解之者可與及言論矣

淮南
子人

問訓

夫物常見則識之常為則能之故因其患則造其備犯
其難則得其便夫以一世之壽而觀千歲之知今古之
論雖未常更也其道理素具可不謂有術乎

淮南子
泰族訓

客有見周公者應之於門曰何以道旦也客曰在外即

言外在內即言內入乎將母周公曰請入客曰立即言
義坐即言仁坐乎將母周公曰請坐客曰疾言則翕翕
徐言則不聞言乎將母周公唯唯旦也踰明日興師而
誅管蔡故客善以不言之說周公善聽不言之說若周

公可謂能聽微言矣

韓詩外傳卷四

小憲多明道理利通

焦氏易林咸之乾

次二明復睽

失冉切

天覩其根測曰明復睽天中獨爛也

太玄經

第六卷

客有見淳于髡於梁惠王者再見之終無言也惠王怪之以讓客曰子之稱淳于生言管晏不及及見寡人寡人未有得也寡人未足為言邪客謂髡曰固也吾前見王志在遠後見王志在音吾是以默然客具報王大駭曰嗟乎淳于生誠聖人也前淳于生之來人有獻龍馬者寡人未及視會生至後來人有獻謳者未及試亦會生至寡人雖屏左右私心在彼夫髡之見惠王在遠與音也雖湯禹之察不能過也志在冒臆之中藏匿不見

髡能知之

王充論衡
知實篇

夫智出於明猶晝之待白日夜之待燭火其明益盛者
所見及遠及遠之明難

劉邵人物
志八觀

夫在天者垂象在地者有形故望山度水則高深可推
風起雲飛則吉凶可步智者觀木不瘁則悟美玉之在
山覲岸不枯則覺明珠之沉淵彗星出則知鱸魚之方
死日月蝕則識麒麟之共闕華霍不須稱而無限之重
可知矣江海不待量而不測之數已定矣鴻鵠之翼騶

騏之足雖未飛走輕迅可必也豪曹之劍徐氏匕首雖未必奮擊其立斷無疑也駸子有吞牛之容鷄鷩有凌鷩之貌卉茂者土必沃魚大者水必廣虎尾不附狸首

象牙不出鼠口

抱朴子外篇清鑒

路人不能挽勁命中而識養由之射顏子不能控轡振策而知東野之敗故有不能下碁而經目識勝負不能

徽絃而過耳解鄭雅者

抱朴子外篇博喻

顏淵弱冠而與仲尼言易童烏九齡而與揚子論玄

揚子

法言註

問神篇

且明智之為物猶泉流之吐潤固不於挹酌而為損舍

竹而增益

一作也

廣文選伏公表
與阮步兵書

託闇藏形不為巧密倚智隱情不足自匿是以重光發

藻尋虛捕景大人貞觀探心昭忒

文選陸機
演連珠

夫人藏形於闇自以為密日發光藻而照之隱情於智

自以為匿聖人垂貞觀而明之

文選陸士
衡連珠註

蔡邕在陳留鄰人有以酒食召邕者比往而酒已酣客

有彈琴於屏帑至門潛聽之曰以樂召我而有殺心何也彈琴者曰我向見螳螂方向鳴蟬蟬將去而未飛螳螂為之一前一却吾心聳然唯恐螳螂之失蟬也此豈為殺心而形於聲者乎

藝文類聚
樂部琴

緹慢曉披即辨黃鍾之氣靈臺夕望便知玉井之色

藝文

類聚方術
部卜筮序

聞鍾於洛浦即辨聲華聽鐸於邯鄲先知響韻

文苑英華
庚信

雜進
奉表

心能善知人者如明鏡善自知者如蚌鏡以耀明故鑒

人蚌以含珠故內照

太平御覽
服用部鏡

夫審輕重莫若權衡正是非其唯賢明

太平御覽
貨部鏡項

東海之魚墜一鱗崑崙之木落一葉聖人皆能知之

太平御覽

御覽木

部木下

一蝗之行一蚊之飛聖人皆知之

太平御覽
蟲豸部蚊

尸子曰聖人之身猶日也夫日圓尺光盈天地聖人之

身小其所燭遠

初學記人
部聖註

瑾戶牖而知天掩雲霧而測暉

初學記器
物部漏刻

初邕避難江南宿於柯亭之館以竹為簫邕仰而盼之

曰良竹也取以為笛竒聲獨絕

初學記樂
部笛註

聖人之通萬物也若日月之光影音聲鼓響聞其聲而

知其形

黃帝素問靈樞
經五音五味

日與月焉水與鏡焉鼓與響焉夫日月之明不失其影
水鏡之察不失其形鼓響之應不後其聲動搖則應和

盡得其情

黃帝素問靈
樞經外篇

譬如有人懸於明鏡見其色像曉了分明無有障蔽元

陽寶鏡亦復如是

元陽妙經卷九

欲得五眼所謂肉眼天眼慧眼法眼佛眼

波羅蜜多經卷二

譬如田家以囊器盛若干種穀麻米粟豆大麥小麥稻
穰明目之人寫之置地分別知之是為麻油是為粳米
是豆粟是為稻穰

先讚波羅蜜經卷九

譬如轉輪聖王知土地長短廣狹譬如瓦師作器知大

小深淺

先讚波羅蜜經卷九

譬如比丘有天眼者能見遠方諸善惡色

大寶積經二十

譬如空中無諸雲霧日輪炎盛放大光明遍照於世

大寶

積經三

十七

如日處空離雲霧光明晃曜普皆照

大寶積經六十一

彼大商主雖未發足能知道中所有一切安危之事善

以智慧籌量觀察備其所須令無乏少將諸商衆乃至

安隱到彼大城身及衆人悉免憂患

大方廣佛華嚴經三十四

善知識者則為導師教化令至彼岸道故善知識者則

為良醫療治一切煩惱患故善知識者則為雲山長養
明淨智慧藥故善知識者則為勇將防護一切諸恐怖
故善知識者則為牢船悉令越度生死海故善知識者
則為船師令至一切智法寶洲故

大方廣佛華嚴
經卷五十八

譬如持燈火入冥室火適入室便亡其冥自明明人有

智慧譬如火光

那先比丘
經卷上

譬如農夫開倉種種別知麻米豆麥等

思惟要
畧法

如好馬見鞭影即覺便著正道

大智度
論卷一

譬如說藥已知其病說病則知其藥

大智度論卷十八

譬如良醫診病知瘥久近可治不可治也

大智度論卷五十

如斧析薪分分解竟無所失

大智度論卷七十

夫見博則不迷聽聰則不惑

弘明集半子理惑論

先見

過伯有氏其門上生莠子羽曰其莠猶在乎

左傳襄公二十一年

夫有男戎必有女戎若晉以男戎勝戎而戎亦必以女

戎勝晉

國語晉

初獻公將伐驪戎卜曰齒牙為禍

史記晉世家

處仲蜂目已露但豺聲未振若不噬人亦當為人所噬

晉書王

敦傳

指洛陽宮門銅駝歎曰會見汝在荆棘中耳

晉書索靖傳

志者察是非龜者知吉凶故曰養志法靈龜

鬼谷子本經陰符註

允目也損者謂減損他慮專以心察也允能知得失者

能知休咎故損允法靈著也

鬼谷子本經陰符註

先物行先理動之謂前識前識者無緣而忘意度也何

以論之詹何坐弟子侍有牛鳴於門外弟子曰是黑牛也而白題詹何曰然是黑牛也而白在其角使人視之果黑牛而以布裹其角以詹子之術嬰衆人之心華焉殆矣故曰道之華也嘗試釋詹子之察而使五尺之愚童子視之亦知其黑牛而以布裹其角也故以詹子之察苦心傷神而後與五尺之愚童子同功是以曰愚之首也故曰前識者道之華也而愚之首也

韓非子
解老

扁鵲見蔡桓公立有間扁鵲曰君有疾在腠理不治將

恐深桓侯曰寡人無扁鵲出桓侯曰醫之好欲治不病
以為功居十日扁鵲復見曰君之病在肌膚不治將益
深桓侯不應扁鵲出桓侯又不悅居十日扁鵲復見曰
君之疾在腸胃不治將益深桓侯又不應扁鵲出桓侯
又不悅居十日扁鵲望桓侯而還走桓侯故使人問之
扁鵲曰疾在腠理湯熨之所及在肌膚鍼石之所及也
在腸胃火齊之所及也在骨髓司命之所屬無奈何也
今在骨髓臣是以無請也居五日桓侯體痛使人索扁

鵲已逃秦矣桓侯遂死故良醫之治病也攻之於腠理此皆爭之於小者也夫事之禍福亦有腠理之地故曰

聖人早從事焉

韓非子喻老

紂為象箸而箕子怖以為象箸必不盛菽藿於土簋則必犀玉之盃玉盃象箸必不盛菽藿則必旄象豹胎旄象豹胎必不衣短褐而舍茅茨之下則必錦衣九重高臺廣室也稱此以求則天下不足矣聖人見微以知萌見端以知末故見象箸而怖知天下之不足也

韓非子說林

彼人生不學道理則嘿然惛於得失不知治亂存亡之所由然怵怵猶醉也而賢王者學問不倦好道不厭銳然獨先廼學道理矣故未治也知所以治未亂也知所以亂未安也知所以安未危也知所以危故昭然先寤乎所以存亡矣故曰先醒辟猶俱醉而獨先發也故世主有先醒者有後醒者有不醒者

賈子新書先醒

福之萌也縣縣禍之生也分分禍福之始萌微故民嫚之唯聖人見其始而知其終故傳曰魯酒薄而邯鄲園

羊羹不斟而宋國危

淮南子
繆稱訓

德有盛衰風先萌焉故得王道者雖小必大有亡形者
雖成必敗夫夏之將亡太史令終古先奔於商三年而
桀乃亡殷之將敗也太史令向藝先歸文王暮年而紂
乃亡故聖人之見存亡之迹成敗之際也非乃鳴條之
野甲子之日也

淮南子
汜論訓

莊王誅里史孫叔敖制冠浣衣文公棄荏席後徽

梅黑

咎犯辭歸故桑葉落而長年悲也

淮南子
說山訓

紂為象箸而箕子唏魯以偶人葬而孔子嘆故聖人見

霜而知冰

淮南子
說山訓

夫鴻鵠之未孚於卵也一指箴之則靡而無形矣及至
筋骨之已就而羽翮之所成也則奮翼揮臄凌乎浮雲
背負青天膺摩赤霄翱翔乎忽荒之上彷徨乎虹蜺之
間雖有勁弩利矰微繳蒲且子之巧亦弗能加也江水
之始出於岷山也可褰衣而越也及至乎下洞庭驚石
城經丹徒起波濤舟航一日不能濟也是故聖人者常

從事於無形之外而不留思盡慮於成事之內是故患

禍弗能傷也

淮南子
人間訓

小人不知禍福之門戶妄動而絀羅網雖曲為之備何
足以全其身譬猶失火而鑿池被裘而用簞也且塘有
萬穴塞其一魚遽無由出室有百戶閉其一盜遽無從
入夫牆之壞也於隙劒之折必有齧聖人見之蚤故萬
物莫能傷也

淮南子
人間訓

太宰子朱侍飯於令尹子國令尹子國啜羹而熱投卮

漿而沃之明日太宰子朱辭官而歸其僕曰楚太宰未
易得也辭官去之何也子朱曰令尹輕行而簡禮其辱
人不難明年伏郎尹而笞之三百夫仕者先避之見終

始微矣

淮南子
人間訓

見亡知存見霜知冰

說苑
談叢

叔姬之始生叔魚也而視之曰是虎目而豕喙鵠肩而

牛腹谿壑可盈是不可饜也必以賂死

列女傳周列
國晉羊叔姬

荅子治陶三年名譽不興家富三倍其妻數諫不用居

五年從車百乘歸休宗人擊牛而賀之其妻獨抱兒而泣姑怒曰何其不祥也婦曰夫子能薄而官大是謂嬰害無功而家昌是謂積殃昔楚令尹子文之治國也家貧國富君敬民戴故福結於子孫名垂於後世今夫子不然貪富務大不顧後害妾聞南山有玄豹霧雨七日而不下食何也欲以澤其毛而成文章也故藏而遠害犬羸不擇食以肥其身坐而須死耳今夫子治陶家富國貧君不敬民不戴敗亡之徵見矣

列女傳周列國陶荅子妻

先知其幾於神乎敢問先知曰不知知其道者其如視

忽眇繇作炳先甲一日易後甲一日難

揚子先知篇

國之修短吉凶卜於龜士之兆卜於琴瑟今臣之鼓瑟

也始彈白駒其聲戾以殺繼而彈闕睢其聲婉以和臣

故得禮於賢主也

天祿閣外史災異

觀九天之變鑽龜占兆

淮南子覽冥訓解

王命之當興也猶春氣之當為夏也其當亡也猶秋氣

之當為冬也見春之微葉知夏有莖葉觀秋之零實知

冬之枯萃

王充論衡
異虛篇

人命稟於天則有表候於體察表候以知命猶察斗斛

以知容矣

王充論衡
骨相篇

且夫所貴貴乎見俊才於無名之中料逸足乎吳坂之
間掇懷珠之蚌於九淵之底指含光之珍於積石之中
若伯喈識絕音之氣於煙燼之餘平子剔逸響之竹於
未用之前六軍之聚市人之會暫觀一覩無所眩惑探
其潛生之心計定其始終之事行乃為獨見不傳之妙

耳

抱朴子外
篇清鑒

必俟考其操蹈之全毀觀其云為之好醜此為絲線既
經於銓衡布帛已歷於大尺徐乃說其斤兩之輕重端
匹之修短人皆能之何煩於明哲哉

抱朴子外
篇清鑒

智者料事於倚杖之表伐木於毫末之初吐高言不於
累綦之際議治亂不於羣狐之中

抱朴子外
篇知止

龜策不出聖謀聖謀定將來之基龜策告未然之事遽

相表裏安有異同

關氏
易傳

穴藏先知雨陰曠未集魚已噉喙巢居之鳥先知風樹

未搖鳥已翔

李善註文選
張茂先雜詩

神龍不處網罟之水鳳凰不翔爵羅之鄉賢人不入危

國智者不輔亂君

意林
任子

曹公使蔣幹說周瑜先覺之謂幹曰吾雖不及夔曠

聞絃賞音足知雅曲也

事文類
聚知人

水之激也實濁其源木之蠹也將拔其根是以延年之

家預論掃墓羊石之族先知滅門

文苑英華
庾信連珠

昔呂望周公問於施政各知其後所以終顏淵乘駟之
日見東野車之馭知其將敗子貢觀邾魯之會而昭其
所以喪仲尼聞師曠之絃而識文王之操季子聽樂覽
衆國之風何必足履目見乎

弘明集牟
子理惑論

見幾

且初為霰者久必暴雪

毛詩正
義類升

惡傷其類視其下等懼次及也語曰鳶鵲蒙害仁鳥增

逝此之謂也

趙氏注孟
離婁上

次七見于壘後乃克飛測曰見于壘幾不足高也

大玄經第

四
逃

林不容兮鳴蜩國不養民賢宜退也余何留兮中州我

去諸夏將遠逝也

王逸註楚辭九懷

剝巢破卵鳳凰為之不翔焚林而畋澆池而魚龜龍為

之不遊

王充論衡指瑞篇

夫淵竭池澆則蛟龍不遊巢傾卵拾則鳳凰不集居言

于室而翔鷗不下凡卉春剪而芝蕢不秀世俗醜正慢

辱將臻彼有道者安得不超然振翅乎風雲之表而翻

爾藏軌於玄漠之際乎

北朴子內
篇明本

夫傾庶鳥之巢則靈鳳不集漉魚鼈之池則神虬遐逝

剗凡獸之胎則麒麟不峙其郊害一介之士則英傑不

踐其境

北朴子外
篇遠民

盖梟鵠屯飛則駕鳳幽集豺狼當路則麒麟遐遁舉善

而教則不仁者遠矣姦偽榮顯則英傑潛迹

北朴子外
篇審舉

徙薪曲突於方熾之火纚舟弭楫於衝風之前瞻九牓

而深沉望密蔚而曾逝不託巢於葦苕之末不偃寢乎

崩山之崖者也

抱朴子外篇知止

若夫善卷巢許管胡之徒咸蹈雲物以高鶩依龍鳳以
踈迹覘韜鋒於香餌之中寤覆車乎來軛之路違險塗
以遐濟故能免詹何之釣絳可謂善料微景於形外觀

堅冰於未霜

抱朴子外篇知止

仁虎匿爪神龍隱鱗

李善註文選任彦升宣德皇后令

却騏驥而不乘兮策駑駘而取路當世豈無騏驥兮誠

莫之能善御見執轡者非其人兮故駒跳而遠去

文選
宋玉

九
辯

鳬鴈皆喑夫梁藻兮鳳愈飄翔而高舉

文選
宋玉九辯

鷹隼羣飛鳳凰遠遊小人成列君子深蔽諺曰脂粉雖

多醜面不加膏澤雖光不可潤草

意林
唐子

趙之相者曰林氏有九子皆賢國人美而稱之號曰九
德之父十德之門趙王疾之王乃使擇其果之煩者伐
之其父曰果之茂者猶伐之況其人乎吾將以爾為累

矣去之則免乃攜老持子逃於白雲之巖

太平御覽
果部果

譬如有人乘於瓦船入於河中心作是念如此瓦船不

久當壞未沒以來可速度岸以免水難

大寶積經
六十六

猶去村不遠有小肉鬻墮在露地或烏或鷄持彼肉去

餘烏鷄鳥競而逐之若此烏鷄能速捨此小肉鬻者餘

烏鷄鳥當復競逐耶居士答曰不也

中阿含經
卷五十五

譬如失火之家黠慧之人明識形勢及火未至急出財

物舍雖燒盡財物悉在更修室宅

大智度論
卷十一

譬如空聚落賊所止處智者不應久住

大智度論
卷五十二

有備

蓄聚美采者以禦冬月之無時也

鄭氏箋
詩谷風

藩落高峻絕穿窬之心

魏志劉
馥傳

太公曰戰攻守禦之具盡在於人事耒耜者其行馬蒺藜也馬牛車輿者其營壘蔽櫓也鋤耰之具其矛戟也蒺藜薶笠者其甲冑干櫓也鑊鉦斧鋸杵臼其攻城器也牛馬所以轉輸糧也雞犬其伺候也婦人織紵其旗

旗也丈夫平壤其攻城也春鋤草棘其戰車騎也夏耨
田疇其戰步兵也秋刈禾薪其糧食儲備也冬實倉廩
其堅守也田里相伍其約束符信也里有吏官有長其
將帥也里有周垣不得相過其隊分也輸粟取芻其廩
庫也春秋治城郭修溝渠其塹壘也故用兵之具盡於

人事也

太公六韜農器

不行其野不違其馬

管子形勢

食無備粟不可以待凶饑庫無備兵雖有義不能征無

義城郭不備全不可以自守心無備慮不可以應卒

墨子

七患

夫桀無待湯之備故放紂無待武王之備故殺桀紂貴為天子富有天下然而皆滅亡於百里之君者何也有富貴而不為備也故備者國之重也

墨子
七患

魚得水而遊焉則樂塘決水涸則為螻蟻所食有掌修其隄防補其缺漏則魚得而利之

淮南子
主術訓

同日被霜蔽者不傷愚者有備與知者同功

淮南子
人間訓

虎兇所以能執熊羆服羣獸者爪牙利而攫便也秦所以超諸侯吞天下并敵國者險阻固而勢居然也故龜倡有介狐貉不能禽蝮蛇有螫人忌而不輕故有備則制人無備則制於人

鹽鐵論險固

孟賁奮臂衆人輕之怯夫有備其氣自倍況以吳楚之士舞利劍蹶强弩以與貉虜騁於中原一人當百不足道也

鹽鐵論論勇

重茵厚席循高採藿雖躓不懼後反其處

焦氏易林屯之豫

擁遏隄防水不得行

焦氏易林
比之大畜

畜水備火終無災禍

焦氏易林
大有之節

張弓控弩經涉山道雖有伏虎誰敢害者

焦氏易林
豫之噬嗑

乘船涉濟載水逢火

焦氏易林
頤之謙

畜水待時以備火災

焦氏易林
大過之歸妹

次六泉源洋洋

音

于丘園測曰泉源之陰不可譏也

太玄經

第五陰

譬如麟角鳳距何必用之

抱朴子外
篇自叙

乘車之法尊者居左御者居中又有一人處車之右以

備傾側是以戎事則稱車右其餘則曰駟乘

前漢書註
文帝紀

酒猶兵也兵可千日而不用不可一日而不備酒可千

日而不飲不可一飲而不醉

事文類
聚酣飲

夫城之有郭猶骨之有皮表裏各異則保障不完皮骨

分離則一體不具

初學記居處
郭城郭註

猶如帝王具足無量珍寶樂具而須城舍牆塹莊嚴防

斷盜賊

靈寶秘
藏經

如有軍將臨戰陣時善備種種鎧鉀刀杖隣國怨敵所

不能害

波羅密多經卷三百五十一

如善射人甲冑堅固執好弓箭不懼怨敵

波羅密多經卷三百五十

六

如人手執利器乃可與賊相禦若無所執而對強敵反

以為害

禪法要解經卷上榮九

喻林卷三十八

欽定四庫全書

喻林卷三十九

明 徐元太 撰

人事門

三十

豫圖

水在火上既濟君子以思患而豫防之

易既濟

今日當預思明日之事如家人宿火矣

左傳正義
二十九年

為虺弗摧為蛇將若何

國語
吳

德不素積人不為用備不豫具難以應卒

後漢書
馮衍傳

治疾及其未篤除患貴其未深

吳志駱統傳

原火不撲蔓草難除青青不伐終致尋斧

宋書武三王傳

去草絕根在於未蔓撲火止燎貴乎速滅

陳書周迪傳

善戰者不待張軍善除患者理於未生勝敵者勝於無

形上戰無與戰故爭勝於白刃之前者非良將也設備

於已失之後者非上聖也

太公六韜軍勢

慮不先定不可以應卒兵不開習不可以當敵

鄧析子無厚篇

不用在早圖不窮在早稼

鄧析子轉辭篇

凡治身養性節寢處節飲食和喜怒便動靜使在己者得而邪氣因而不生豈若憂癰疵之興瘞疽之發而豫

備之哉

淮南子
詮言訓

夫至巧不用劔善閉者不用闕捷

淮南子
說山訓

良醫者常治無病之病故無病聖人者常治無患之患

故無患也

淮南子
說山訓

事者難成而易敗也名者難立而易廢也千里之隄以螻蟻之穴漏百尋之屋以突隙之煙焚人莫蹟於山而

蹟於埴是故人皆輕小害易微事以多悔患至而後憂之是猶病者已惓而後索良醫也雖有扁鵲俞跗之巧

猶不能生也

淮南子
人間訓

殘材木以成室屋者非良匠也殘賤民人而欲治者非良吏也故公輸子因木之宜聖人不費民之性是以斧斤簡用刑罰不任政立而化成扁鵲攻於腠理絕邪氣故癰疽不得成形聖人從事於未然故亂原無由生是以砭石藏而不施法令設而不用斷已然鑿已發者凡

人也治未形覩未萌者君子也

鹽鑄論
大論

所貴良醫者貴其審消息而退邪氣也非貴其下鍼石
而鑽肌膚也所貴良吏者貴其絕惡於未萌使之不為
非非貴其拘之囹圄而刑殺之也

鹽鑄論
申韓

兵不豫定無以待敵計不先慮無以應卒

說苑
談叢

富必念貧壯必念老年雖幼少慮之必早

說苑
談叢

不困在於早慮不窮在於早豫

說苑
談叢

或曰奔壘之車沈流之航可乎曰否或曰馬用智曰用

智於未奔沈大寒而後索衣裹不亦晚乎

楊子
寡見

賊方至以疾走為務食不消以黃丸為先子徒知此為
賢於安須臾與求乞胡而不知制賊病於無形事功幽
而無跌也夫救火以水雖自多於抱薪而不知曲突之

先物矣

嵇中散集難宅
無言山攝生論

君子欲正其末必端其本欲輟其流則遏其源

抱朴子
外篇守

塔

旱極則水水極則旱故於旱時而預蓄舟水時預蓄車

以待其貴收其利也

前漢書註貨
殖昔先王傳

已亂而後治之戰鬪而後獲勝則不足貴

前漢書註
句奴傳

御災在於未發思患在乎預防

揚子法言
註寡見篇

甲者一旬之始已有之祕也先之一日未兆也後之一

日已形也夫求福於未兆之前易救禍於已形之後難

揚子法言

註先知篇

伐謀先兆擠響於音

文選陸士
衡功臣頌

將伐其謀先其未兆欲墜其響在於為音然兆為謀始

響為音初也

李善註文選陸士衡漢功臣頌

渴而後穿井飢而後殖種可以圖遠難以應卒也

補文選曹

植諫伐遼東表

夫瘡之未發也陰未并陽陽未并陰因而調之真氣得安邪氣乃亡故工不能治其已發為其氣逆也

黃帝素問內經

瘡論

聖人不治已病治未病不治已亂治未亂此之謂也夫病已成而後藥之亂已成而後治之譬猶渴而穿井鬪

而鑄兵不亦晚乎

黃帝素問內經
四氣調神大論

上工救其萌芽必先見三部九候之氣盡調不敗而救之故曰上工下工救其已成救其已敗

黃帝素問內經
八正神明論

善治者治皮毛其次治肌膚其次治筋脉其次治六腑其次治五藏治五藏者半死半生也

黃帝素問內經
陰陽應象大論

上工刺其未生者也其次刺其未盛者也其次刺其已衰者也下工刺其方襲者也與其形之盛者也與其病之與脉相逆者也故曰方其盛也勿敢毀傷刺其已衰

事必大昌故曰上工治未病不治已病此之謂也

黃帝素問

靈樞經

逆順

且一身猶一國也胸腹之位猶宮室也四肢之列猶郊境也骨節之分猶百官也神猶君也血猶臣也氣猶民也故知理身則知理國愛其民所以安其國吝其氣所以全其身民散則國亡氣竭則身死亡者不可存死者不可生所以至人消未起之患理未病之疾堅守之於無事之前不追之於既逝之後

廣黃帝本行記

治之未亂正之未傾禁姦之本制偽之端閉邪之戶塞

枉之門

道德經指
歸卷十一

大難之將生也猶風邪之中人未然之時慎之不在在

於皮毛湯熨去之入於分理微箴取之在於藏府百藥

除之入於骨髓天地不能憂而造化不能治

道德經指
歸卷之一

未疾之人易為醫也未危之國易為謀也萌芽之患易

事也小弱之禍易憂也

道德經指
歸卷十一

任車未虧僮子行之及其傾覆也顛高墮谷千人不能

安卵之未剖也一指摩之及其為飛鴻也奮翼凌雲曾
繳不能連也胎之新乳也一繩制之及其為牡也羅網
不能禁也虎也執羣獸食牛馬劔戟不能難也故漣滴
之流久久而成江海小蛇不死化為神龍積微之善以
至吉祥小惡不止乃至滅亡

道德經指
歸卷十一

菓瓜結實未堅虛脆易破初心起染亦復如是結業微
淺故易除也

道德經註
疏卷六

譬如已滅之火不復求救但多方便防未來火又如治

病已減之病不復加治但治將生病

大智度論
卷三十八

譬如有人始遇患苦或有醫師少給湯藥則可令差亦如小樹初生之時以爪能斷及其長大雖有百斧伐之

猶難

本緣經持
王子品

原道

為尊者諱耻為賢者諱過為親者諱疾

穀梁成
公九年

趙王封孟嘗君以武城孟嘗君擇舍人以為武城吏而遣之曰鄙語豈不曰借車者馳之借衣者被之哉皆對

曰有之孟嘗君曰文甚不取也夫所借衣車者非親友則兄弟也夫馳親友之車被兄弟之衣文以為不可今趙王不知文不肖而封之以武城願大夫之往也毋伐樹木毋發屋室訾然使趙王悟而知文謹使可全而歸之

戰國策趙惠文王

國之有封疆家之有垣牆所以合好掩惡也室不能相和出語隣家未為通計也怨惡未見而明棄之未為盡

厚也

戰國策燕王喜

君子不臨深以為高不因少以為多況創病君父以為

已功者哉

風俗通
過譽

人足所履不過數寸然而咫尺之途必顛蹙於崖岸拱
把之梁每沉溺於川谷者為其傍無餘地故也君子之
立已抑亦如之至誠之言人未能信至潔之行物或致
疑皆由言行聲名無餘地也

顏氏家
訓名實

淳酒味甘飲之者醉不相知薄酒酸苦賓主嘖蹙

王充
論衡

自然

篇

居窮則志篤處達則恩輕是以楚君施轡激三軍之澆

俗少原流慟誚輕薄之頽風

李善註文選陸士衡演連珠

宣帝時公卿朝會丞相次曰聞臬生子長且食其母寧

然有賢者應曰但聞烏子反哺耳丞相大慚君子之於

鳥獸尚為之諱況人乎

事文類聚伯勞桓譚新論

孔子將行雨無蓋門人曰商也有馬孔子曰商也之為

人也甚短於財吾聞與人交者推其長者達其短也者

故能以久也

太平御覽服用部

人亦有言賈則易交利重太山道輕鴻毛久而益敬見

之晏平霜雪既至勁栢冬青

初學記人
郭交友

越俗性率朴初與人交有禮封土壇祭以犬雞祝曰卿

雖乘車我戴笠後日相逢下車揖我步行卿乘馬後日

相逢卿當下

初學記人
郭交友

新序樂毅書君子絕交無惡言去臣無惡聲

因學紀聞
卷十一攷

史

博愛

東風生長之風也山巔之上草木猶及之

鄭氏箋
詩谷風

畀之為言與也能以其餘畀其下者也煇者甲吏之賤者也胞者肉吏之賤者也翟者樂吏之賤者也閹者守門之賤者也古者不使刑人守門此四守者吏之至賤者也尸又至尊以至尊既祭之末而不忘至賤而以其

餘畀之

禮記
祭統

當尚同之為說也上用之天子可以治天下矣中用之諸侯可以治其國矣小用之家君可以治其家矣是故

大用之治天下而不窺小用之治一國一家而不橫者
若道之謂也故曰治天下之國若治一家使天下之民

若使一夫

墨子尚
同下

藉為人之國若為其國夫誰獨舉其國以攻人之國者
哉為彼者由為己也為人之都若為其都夫誰獨舉其
都以伐人之都者哉為彼猶為己也為人之家若為其
家夫誰獨舉其家以亂人之家者哉為彼猶為己也

墨子

無愛

下

陰陽以廣陶濟物三光以普照著明蒿華以藏疾為曠
北溟以含垢稱大碩儒以與進弘道遠教以博愛容衆

抱朴子外

篇廣譬

具以九圍共溺竝識歸涯萬國均夢一日俱曉

藝文類聚內典

部寺

碑表

尸子曰舜魚愛百姓務利天下其田歷山也荷彼耒耜
耕彼南畝與四海俱有其利其漁雷澤也旱則為耕者
鑿漬險則為獵者表虎故有光若日月天下歸之若父

母

因學紀聞
卷十諸子

維摩詰言從癡有愛則我病生以一切衆生病是故我

病若一切衆生得不病者則我病滅

維摩詰所說
經問疾品

譬如長者唯有一子其子得病父母亦病若子病愈父

母亦愈菩薩如是於諸衆生愛之若子衆生病則菩薩

病衆生病愈菩薩亦愈

維摩詰所說
經問疾品

施德

子女玉帛則君有之羽毛齒革則君地生焉其波及晉

國者君之餘也

左傳僖公二十三年

吾儕小人所謂取諸其懷而與之也

左傳宣公十年

小國之仰大國也如百穀之仰膏雨焉若常膏之其天

下輯睦豈惟敝邑

左傳襄公十九年

小國為繁大國為省穡而用之其何實非命

左傳昭公元年

雖獲歸骨於晉猶子則肉之

左傳昭公十三年

勝如卵余翼而長之

左傳哀公十六年

公子賦黍苗子餘曰重耳之印君也若黍苗之印陰雨

也若君實庇廕膏澤之使能成嘉穀薦在宗廟君之力

也

國語
晉

若君不忘周室而為弊邑宸宇亦寡人之願也

國語
越

杜赫欲重景翠於周謂周君曰君之國小盡君之重寶
珠玉以事諸侯不可不察也譬之如張羅者張之於無
鳥之所則終日無所得矣張於多鳥處則又駭鳥矣必
張於有鳥無鳥之際然後能多得鳥矣今君將施於大
人大人輕君施於小人小人無可以求又費財焉君必

施於今之窮士不必且為大人者故能得欲矣

戰國策周惠公

宣揚朝恩示以和睦曠若開雲見日

後漢書袁紹列傳

倍知厚德篤於慈父寢淫肌膚滲漉骨髓德重山嶽澤

深河海

後漢書馮衍傳註

冀高世之德施於田子老馬之惠贈以秦穆駿馬之恩

使長有依歸以效忠心

後漢書馮衍傳註

於覆巢之下蒙全卵之施

晉書慕容德傳

拯我塗炭惠隆丘阜潤同江海恩猶父母

晉書麴詹傳

鳥雀投人尚能濟免

晉書赫連勃勃記

濯其泥沙假以毛羽

陳書周迪傳

陰德者何猶耳鳴已獨聞之人無知者

隋書李士謙隱逸傳

莊周家貧故往貸粟於監河侯監河侯曰諾我將得邑金將貸子三百金可乎莊周忿然作色曰周昨來有中道而呼者周顧視車轍中有鮒魚焉周問之曰鮒魚來子何為者耶對曰我東海之波臣也君豈有升斗之水而活我哉周曰諾我且南游吳越之王激西江之水

而迎子可乎鮒魚忿然作色曰吾失我常與我無所處
吾得升斗之水然活耳君乃言此曾不如早索我於枯

魚之肆

莊子
外物

有力者疾以助人有財者勉以分人有道者勸以教人

墨子尚

賢下

今贛人教倉子人河水饑而餐之渴而飲之其入腹者
不過葷食瓢漿則身飽而教倉不為之減也腹滿而河
水不為之竭也有之不加飽無之不為饑與守其箒箠

有其井一實也

淮南子
精神訓

僇負羈以壺食表其間趙宣孟以束脯免其軀禮不隆而德有餘仁心之感恩接而惜怛生故其入人深俱之叫呼也在家老則為恩厚其在債人則生爭鬪故曰兵莫憊於意志莫邪為下寇莫大於陰陽枹鼓為小

淮南子
繆訓

稱訓

君子見過忘罰故能諫見賢忘賤故能讓見不足忘貧

故能施

淮南子
繆稱訓

今人放燒或操火往益之或接水往救之兩者皆未有功而怨德相去亦遠矣

淮南子
說山訓

請而得其賞廉者不受也言盡而名至仁者不為也今天油然作雲沛然下雨則苗草興起莫之能禦今為一人言施一人猶為一塊土下雨也土亦不生之矣

說苑
復恩

莊周貧者往貸粟於魏文侯曰待吾邑粟之來而獻之周曰乃今者周之來見道傍牛蹄中有鮒魚焉大息謂周曰我尚可活也周曰須我為汝南見楚王決江淮以

溉汝鮒魚曰今吾命在盆甕之中耳乃為我見楚王決
江淮以溉我汝則求我枯魚之肆矣今周以貧故來貸
粟而曰須我邑粟來也而賜臣即來亦求臣傭肆矣

說苑

善說

朝露不久為恩惠少膏澗欲盡咎在枯槁

焦氏易林
震之同人

妾之幸於君王猶魚之狎於江海也江海不為一魚而

深其流君王不為一妾而深其恩

天祿閣外
史齊姬

絲成帛縷成布賜人絲縷猶為重厚况遺人以成帛與

織布乎

王充論衡
異虛篇

袁將軍再與兄子分家財多有以為恩義崑山之下以
玉為石彭蠡之濱以魚食犬豕使推讓之人財若崑山
之玉彭蠡之魚家財再分不足為也

王充論衡
定賢篇

設使有困病垂死而有能救之得愈者莫不謂之為弘
恩重施矣今若按僂經飛九丹水金玉則天下皆可令
不死其惠非但活一人之功也

抱朴子內
篇釋滯

饑饉之春不賑朋戚多稔之秋饗及四隣不賑朋戚人

之惡行惠及四隣人之善義善惡之行出於性情而繫

於饑穰也

劉子
辨施

夫山阜非為鳥植林林茂而鳥自棲之江湖非為魚鑿
潭潭深而魚自歸之處世非為人積財財積而人自依
之非其所招勢使然也

劉子
辨施

策駟登山不得直轡而行泛舟入海不得安身而坐何
者山路迂迴海水淪波行者欲直而路曲之坐者欲安
而水蕩之仁者欲施而貧過之

劉子
辨施

食不滿腹豈得輟口惠人衣不蔽形何得露體而施物

非性儉嗔不足故也

劉子
辨苑

施暢春風澤如時雨是以不別荆棘者慶雲之惠也七

子均養者鴈鳩之仁也舍罪責功者明君之舉也矜愚

愛能者慈父之恩也是以愚臣徘徊於恩澤而不敢自

棄者也

文選上責
躬詩表

不悟日月之明遂垂曲照雲雨之澤播及朽瘁

文選陸
機謝內

史
表

重蒙陛下愷悌之宥迴霜收電使不隕越

文選陸機
謝內史表

咳唾為恩盼睐成節

文選任昉到大
司馬記室牋

愛流成海情塵為岳

文選王巾頭
陀寺碑文

一言之譽東陵侔於西山一盼之榮鄭璞踰於周寶

文選

任昉王文

憲集序

竊以月滿則虧恩來無爽海潮雖大萬江恒注

藝文類
聚食物

部末

啟

攀窘逼歸原曰窮鳥入懷原曰焉知斯懷之可入遂匿

之

藝文類聚
寶玉部金

洪恩罔極雲雨增加既榮本幹枝葉并蒙

藝文類聚封
爵部親戚封

章

故知假人延譽重於連城借人羽毛榮於尺玉溟池九
萬里無踰此澤之深華山五千仞終愧斯恩之重

文苑
英華

庾信謝文序

并和詩啟

况復棲鳥挾子同知桂樹之恩澤雉將雛共喜行春之

令根株一潤枝葉俱榮

文苑英華庾
信謝賜齋啟

花開四照唯見其榮
鼇載三山深知其重

文苑英華庚信謝賜齋啟

莊周車轍實有涸魚
信陵鞭前元非窮鳥

文苑英華庚信謝賜齋啟

得使已枯之木蒙靈陽之潤
焦炎之草幸甘雨之溉

漢武

帝內傳

喻如甘露雨柯葉悉沾恩

海空智藏經問病品偈

或施以物歸獻三寶
或施以法覺悟一切

虛皇四十九章

行施時於諸凡夫衆生起慈念想
譬如父母瞻視病子

行施散時其心喜悅
猶如父母見子病愈

元陽妙經卷五

一切有情須食與食須飲與飲須乘與乘須衣與衣須
花香與花香須瓔珞與瓔珞須房舍與房舍須牀榻與
牀榻須臥具與臥具須燈明與燈明須財穀與財穀須
珍寶與珍寶須伎樂與伎樂須侍衛與侍衛隨其所須

種種資具

波羅密多
經卷八

譬如摩那斯龍王將欲降雨先興重雲彌覆虛空凝停
七日而未降雨先令衆生究意諸業何以故彼大龍王
慈悲心故過七日已漸降微雨普潤大地

大方廣佛華
嚴經三十五

所行惠施無有斷絕如春夏樹華果相續

本緣經毗
羅摩品

譬如大雨百穀滋長恒以五指施人財猶如五龍降注

大雨

本緣經持
王子品

若人饑渴給足飲食感恩則深

大智度論
卷五十四

施有三種一財施二心施三法施以財施人名為布施

慈心等心與人樂名為心施說法利人名為法施

羅什
譯維

摩詰經

菩薩品

順施

伐木者倚其巔析薪者隨其理

毛詩
小弁

乘風理弋追逸羽於高雲臨波命釣引沈鱗於大壑苟

得其道為工其事

北齊書
杜弼傳

天下之物有甚滑稽而難持者女知之矣乎疾之則脫

緩之則放焉以逝非捉圜之謂也而所謂善持者能為

之於疾徐之間

子華子
神氣

天不能冬蓮春菊是以聖人不違時地不能洛橘汶貉

是以聖人不違俗聖人不能使手步足握是以聖人不

違我所長聖人不能使魚飛鳥馳是以聖人不違人所長

關尹子

九藥

度已以繩故足以為天下法則矣接人用拙故能寬容

因求以成天下之大事矣

荀子非相篇

與陽言者依崇高與陰言者依卑小

鬼谷子裨闡

假之有人而欲南無多而惡北無寡豈為夫南者之不可盡也離南行而北走也哉今人所欲無多所惡無寡豈為夫所欲之不可盡也離得欲之道而取所惡也哉

荀子

正名

周書曰掩雉不得更順其風

淮南子覽冥訓

言已朝發天之東津萬物所生夕至地之西極萬物所

成動順陰陽之道

王逸註離騷經

風從於雷趾受

平表切

于睥

元包經傳孟陰

股運于腹婦歸於姑

元包經傳孟陽

无妄頁

音顛

顛顛趾延延子欽于父雷奮于天

元包經傳孟陰

念故

鹿之奔走其勢宜疾而走伎伎然舒留其羣也

鄭氏箋詩小弁

豈如弁髦而因以敝之

左傳昭公九年

子不聞河上歌乎同病相憐同憂相救驚翔之鳥相隨而集瀨下之水因復俱流胡馬望北風而立越鷺向日而熙誰不愛其所近悲其所思者乎

吳越春秋閻閭內傳

食其實者不傷其枝飲其水者不濁其流

吳越春秋越王無余外傳

陳軫曰王獨不聞吳人之遊楚者乎楚王甚愛之病故使人問之曰誠病乎意亦思乎左右曰臣又知其思與

不思誠思則將吳吟今軫將為王吳吟

戰國策秦惠文君

秦惠王曰子去寡人之楚亦思寡人不陳臻對曰王聞夫越人莊舄乎王曰不聞曰越人莊舄仕楚執珪有頃而病楚王曰舄故越之鄙細人也今仕楚執珪富貴矣亦思越不中謝對曰凡人之思故在其病也彼思越則越聲不思越則楚聲使人往聽之猶尚越聲也今臣雖棄逐之楚豈能無秦聲哉

史記張儀傳

富貴不歸故鄉如衣繡夜行誰知之者

史記項羽紀

家貧則思良妻國亂則思良相

史記魏世家

太公封齊五世葬周狐死首丘代馬依風夫周齊同在中土千里之間況於遠處絕域小臣能無依風首丘之

思哉

後漢書班超列傳

忠臣過故墟而歎孝子入舊室而哀歎

後漢書馮衍傳

朔馬心何悲念舊中心勞燕雀何徘徊意欲還故巢

晉書

呂光記

衣莫若新人莫若故

晏子春秋上

景公有愛女請嫁於晏子公乃往燕晏子之家飲酒酣公見其妻曰此子之內子耶晏子對曰然是也公曰嘻亦老且惡矣寡人有女少且姣請以滿夫子之宮晏子違席而對曰乃此則老且惡嬰與之居故矣故及其少而姣也且人固以壯託乎老姣託乎惡彼嘗託而嬰受之矣君雖有賜可以使嬰倍其託乎

晏子
雜下

舊國舊邦望之暢然雖使丘陵草木之緡入之者十九

猶之暢然況見見聞聞者也

莊子
則陽

昔楚昭王與吳人戰楚軍敗昭王走屨決背而行失之
行三十步復旋取屨及至於隋左右問曰王何曾惜一
跣履乎昭王曰楚國雖貧豈愛一跣履哉思與偕反也
自是之後楚國之俗無相棄者

賈子
論誠

孔子出遊少源之野有婦人中澤而哭其音甚哀孔子
使弟子問焉曰夫人何哭之哀婦人曰鄉者刈著薪以
吾著簪吾是以哀也弟子曰刈著薪而亡著簪有何悲
焉婦人曰非傷亡簪也盖不忘故也

韓詩
外傳

籩豆茵席所以官者也而棄之顏色黎黑手足胼胝所以執勞苦而皆後之臣聞國君蔽士無所取忠臣大夫蔽遊無所取忠友今至於國臣在所蔽之中矣

說苑
復恩

好諫者思其君食美者念其親

說苑
反質

與人同寒苦雖有小過猶與之同死而不去況於安新

忘舊乎

列女傳周列
國晉趙衰妻

飛不遠去還歸故處

焦氏易林
小過之巽

在貴多忘賤為恩誰能博狐白足禦冬焉念無衣客

曹子

建贈
丁儀

鷓鴣白黑成文其鳴自呼象小雉其志懷南不北徂也

張華註
禽經

羈鳥戀舊林池魚思故淵

陶靖節集
詩五言

胡馬仰朔雲越鳥巢南樹

李善註文選
赭白馬賦

狐獸思故藪離鳥悲舊林

文選陸士衡贈
從兄車騎詩

越人衣文蛇代馬依北風君子於其國也愴愴傷於心

李善註文選

張景陽雜詩

鍾儀幽而楚奏兮莊舄顯而越吟人情同於懷土兮豈

窮達而異心

文選登
梅賦

感平生之遊處兮若壘虎之相須何今日之兩絕若胡

越之異區

文選鸛
鵲賦

信松茂而栢悅嗟芝焚而蕙歎苟性命之不殊豈同波

而異瀾

文選歎
逝賦

況復已朝餐曷由知我饑

文選郭泰機
答傅咸詩

達之所服貴有或遺窮之所接賤而必尋是以江漢之

君悲其墜屨少原之婦哭其亡簪

大選陸機
演連珠

茱萸自有芳不若桂與蘭新人雖可愛不若故所懽

廣文

選曹子建

浮萍篇

莫以豪賢故棄捐素所愛莫以魚肉賤棄捐葱與薤莫

以麻枲賤棄捐管與蒯

廣文選曹孟
德塘上行

延陵季子使過徐徐君心欲得其寶劍弗忍言季子心

許之而未及與及還而徐君已薨乃脫寶劍懸於墓樹

徐人竒之曰延陵季子不忘舊故脫千金之劍掛丘樹

藝文類聚

人部懷舊

故交不可忘猶如蘭桂芳新知雖可悅不異茱萸香

藝文

類聚人部

閨情詩

衣不厭新人不厭故

藝文類聚人部別下書

陳席不棄故劍無遺

藝文類聚職官部太子詹事表

武王衣之銘曰桑蠶苦女工難得新捐故後必寒

玉海聖文

御製

賦

譬如陸龜心常念水

海空智藏經持誡品

利人

古者聖王亦嘗厚措歛乎萬民以為舟車既已成矣曰
吾將惡許用之曰舟用之水車用之陸君子息其足焉
小人休其肩背焉故萬民出財賄而予之不敢以為感
恨者何也以其反中民之利也

墨子非
樂上

所為貴良寶者為其可以利也而和氏之璧隋侯之珠
三棘六異不可以利人是非天下之良寶也今用義為
政於國家人民必衆刑政必治社稷必安所為貴良寶

者可以利民也而義可以利人故曰義天下之良寶也

墨子

耕柱

公輸子削竹木以為鸛成而飛之三日不下公輸子自以為至巧子墨子謂公輸子曰子之為鸛也不如翟之為車轄須臾斲三寸之木而任五十石之重故所為巧

利於人謂之巧不利於人謂之拙

墨子
魯問

人為嬰兒也父母養之簡子長而怨子盛壯成人其供養薄父母怒而謂之子父至親也而或譙或怨者皆狹

相為而不周於為己也夫賣庸而播耕者主人費家而
美食調布而求易錢者非愛庸客也曰如是耕者且深
耨者熟耘也庸客致力而疾耕耕者盡巧而正畦陌者
非愛主人也曰如是美且美錢布且易云也此其養功
力有父子之澤矣而心調於用者皆挾自為心也故人
行事施予以利之為心則越人易和以害之為心則父

子離且怨

韓非子外
儲說左

匡章謂惠子曰公之學去尊今又王齊王何其到也惠

子曰今有人於此欲必擊其愛子之頭石可以代之匡
章曰公取之代乎其不與施取代之子頭所重也石所
輕也擊其所輕以免其所重豈不可哉匡章曰齊王之
所以用兵而不休攻擊人而不止者其故何也惠子曰
大者可以王其次可以霸也今可以王齊王而壽黔首
之命免民之死是以石代愛子頭也何為不為民寒則
欲火暑則欲水燥則欲濕濕則欲燥寒暑燥濕相反其
於利民一也利民豈一道哉當其時而已矣

呂氏春秋
秋愛類

象解其牙不憎人之利之也死而棄其招贅不怨人取

之人能以所不利利人則可

淮南子
說山訓

屠者羨霍為車者步行陶者用缺盆匠人處狹廬為者

不得用用者弗肯為

淮南子
說林訓

家人有嚴君焉井竈之謂也俾冬作夏非竈孰能俾夏

作冬非井孰閑

藝文類聚
火部竈

齊女徐吾者東海上貧婦與其鄰婦李吾合燭夜績徐
吾最貧而燭不屬或謂李吾曰徐吾燭數不屬請無與

夜徐吾曰妾以貧故起常先去常後掃陳席以待來者
坐常處下為貧故也今一室之中益一人燭不為益明
去一人燭不為益闇何愛東壁餘光莫之能應遂復與

夜績

事文類聚燭

舜兼愛百姓務利天下其田歷山也荷彼耒耜耕彼南
畝與四海俱有其利其魚雷澤也旱則為耕者鑿漬險
則為獵者表虎故有光若日月天下歸之若父母

太平御覽

皇王部帝

舜有虞氏

欲蠲人之憂則贈以丹棘丹棘一名忘憂欲蠲人之念

則贈以青棠青棠一名合歡

太平御覽
木部合歡

譬如良藥能除衆生種種病根

海空智藏
經持誡品

譬如衆生身有病苦恰遠夷塗而行嶮道嶮道多難備

受衆苦忽有異人見愍念之即將教以平坦之路

海空
智藏

經供
獻品

譬如有人患諸重疾枕卧牀席飲食不能氣命無幾忽
於空中得甘露藥盈滿一卮歟在頭首其人大驚疑是

鬼毒妖災所降又復疑是神明所賜當欲飲之進退未
敢忽於空中有一善神發聲唱言是大妙藥可取服之
疾者聞已方大歡喜取藥而飲病便除瘥

海空智藏
經序品

亦如有人欲之彼國隔大河流翹彼岸渺然萬里愁苦
屏營不能自抑善濟神王忽於岸邊化作一舟篙櫂行
具觸事無乏中有一人語欲度人汝可入此當載汝過
其人即驚我在此久多時覓船終不能得那忽今日挺
然化有當是鬼魅誘我入水若是化惑後必生害我寧

止此卒於性命脫失計去死悔無及即於爾時善濟神王化作飛仙於靈霞間高聲唱言此是善神欲濟汝命度去無嫌是時此人得聞斯語心大歡喜安隱無量便

入船中直過彼岸

海空智藏
經序品

譬如虛舟汎浮濟溺無意而浮任人東西到所岸者捨

舟便去況非舟耶

無上內祕藏
經解脫品

譬如有人墮墜園廁糞穢之處在此廁中云何得出有

善男子見而愍之尋前捉髮拔之令出

元陽妙
經卷七

悉如良井縱使天下大旱百丈絕源此井猶滿井主足
用餘以施人百千萬人舉鄉郭人恣意汲取給拯無極
終於無竭

靈寶通微經

一切有情長時履踐猶如道路亦如橋梁

波羅塞多經三百三十七

如大長者無量資財為一切人之所受用

波羅塞多經卷五百六十

八

譬如三千大千世界所出諸物無不皆為有情受用

波羅

塞多經卷

五百七十

譬如真金常與有情作大饒益謂未出礦若出礦時若轉變成諸莊嚴具若復出賣轉買餘物皆與無量無邊有情隨其所應作大饒益

波羅蜜多經
五百八十三

譬如王子未紹王位與諸有情作大饒益若紹王位亦與有情作大饒益若命終後亦與有情作大饒益

波羅
蜜多

經五百

八十三

譬如剎利灌頂大王多有倉廩盈儲穀豆嚴誠王司善令監守何以故於饑饉世當濟羣生

大寶積
經二十

如大雪山中有大藥王名為毗伽摩若聞其聲一切世間猛烈毒熱皆悉消滅若藥所住百踰繕那其威盛故令諸惡毒皆無勢力若以藥王塗大螺鼓共擊若吹其聲所及諸有衆生或飲毒藥或被毒螫毒塗毒刺衆毒惱者但聞如是螺鼓之聲暫至於耳一切諸毒皆得除

滅

大寶積經
四十八

譬如雪山王中生諸藥草無有所屬無所分別隨病所

服皆能療治

大寶積經卷
一百一十二

護諸怖畏如親如友訪諸怨敵如漸如城救諸危難猶

如父母藏諸怯劣猶若叢林

大集地藏十輪經卷一

譬如大雲於夏暑月降霖大雨乃至增長一切種子

大方

廣佛華嚴經

卷四十三

譬如日出生育衆生無眼根故未曾得見雖未曾見然

為日光之所饒益何以故因此得知晝夜時節受用種

種衣服飲食令身調適離衆患故

大方廣佛華嚴經卷五十

譬如大水以能利潤受用衆生故譬如大城以能滿足

一切智慧功德故譬如僮僕以心慈悲代諸衆生勤苦

事故

法集經
欲四

四駛生死河法船度彼岸

中陰經
卷下

菩薩妙行有四事何等為四一者願我常生無佛世界
喻如日月行闇浮提為其陰冥二者如以金錍決其眼
膜令覩光明三者作大藥樹一切衆生得聞香者病苦
悉除四者常演說法澍雨法雨萌芽生長成就果實悉
發無上菩提之心是為菩薩四大弘誓

七佛所說神
咒經卷四

譬如種種妙香一人賣一人買傍人在邊亦得香氣於

香無損二主無失

大智度論
卷二十八

譬如甘美果樹茂盛成就人大歡喜以樹有種種利益

有庇其蔭者有用其華食其果實

大智度論
三十五

如深水難渡有人分散此水令淺則渡者皆易


大智度
論卷六

五十

譬如人行安隱道免諸患難常念此道以示人

大智度
論卷七

十



喻林卷三十九